

Leftenan Muda Pertahanan Awam ikon kesiapsiagaan awam

NST 16.11.2017 6

KOTA KINABALU: Pegawai Pasukan Siswa Angkatan Pertahanan Awam (APM) yang ditauliahkan adalah ikon kesiapsiagaan awam dalam menghadapi bencana.

Timbalan Ketua Pesuruhjaya Operasi APM, Roslan Wahab berkata pelantikan Pegawai Muda Pasukan Siswa APM adalah bukti mereka kini bersiap sedia untuk memikul tanggungjawab bagi membantu APM.

"Leftenan muda kita yang ditauliahkan adalah bukti mereka kini bersiap sedia untuk memikul tanggungjawab bagi membantu APM dalam melaksanakan sebarang aktiviti kesedaran keselamatan awam menghadapi kecemasan dan bencana," katanya ketika hadir menyempurnakan Majlis Pentauliahkan Pasukan Siswa Angkatan Pertahanan Awam Malaysia (Pasukan Siswa APM) di UMS Peak, Universiti Malaysia Sabah (UMS) kelmarin.

Menurut beliau, peranan APM bukan hanya terikat dengan aktiviti latihan kepada anggota semata-mata, tetapi lebih kepada membantu di saat kecemasan.

"Peranan kita sangat besar dan diperlukan oleh masyarakat, yang mana kita bukan hanya menjalani latihan tetapi kita juga menjalankan tugas bencana, tugas siap sedia kecemasan dan latihan kepada agensi-agensi luar bagi tujuan memenuhi kehendak semasa.

"Cabaran masa kini perlu kita pikul secara holistik tanpa mengira kaum, budaya dan latar belakang akademik atau agama," katanya lagi.

Seramai 57 Pegawai Pasukan Siswa APM ditauliahkan pangkat Leftenan Muda Pertahanan Awam dan mereka adalah antara yang berjaya menamatkan latihan sepanjang tiga tahun bersama APM.

Majlis pentauliahkan itu merupakan kali kelima yang diadakan untuk Pegawai Pasukan Siswa APM UMS.

"Untuk pentauliahkan kali ini, 80 peratus persiapan adalah dilakukan oleh pegawai-pegawai muda kita sendiri yang mana saya yakin dengan ilmu dan latihan yang mereka peroleh selama tiga tahun ini sangat membantu.

"Saya merasakan pentauliahkan yang berkonsep outdoor kali ini merupakan satu pengalaman yang mampu dijadikan sebagai



PEMAKAIAN pangkat yang disempurnakan oleh Roslan kepada anggota pegawai muda yang menerima pentauliahkan di UMS Peak, kelmarin.

pembakar semangat kepada pegawai-pegawai muda ini untuk terus mengaplikasikan apa yang telah dipelajari dengan menyumbang kepada masyarakat," jelasnya.

Dalam pada itu, Penolong Pesuruhjaya Kehormat (Pertahanan Awam) merangkap Komandan Pasukan Siswa APM UMS, Prof. Dr. Shahril Yusof berkata semangat kesukarelawan dalam diri setiap kadet adalah kunci kepada kejayaan sesebuah pasukan unit beruniform.

"Hari ini kita dapat lihat pegawai-pegawai muda kita yang ditauliahkan, mereka adalah antara yang bersedia untuk berkhidmat kepada masyarakat.

"Dalam unit ini, kita sedia maklum yang anggota kita semuanya memiliki ilmu pertahanan awam yang mencukupi yang diperoleh sepanjang mereka terlahit disini," katanya.

Tambah beliau, usaha juralatih dan para pegawai yang melatih platoon juga adalah satu usaha yang harus dibanggakan oleh semua pihak.

Majlis pentauliahkan itu turut dihadiri oleh ibu bapa pegawai muda yang ditauliahkan, pegawai-pegawai APM dan kadet-kadet yang baru menyertai APM. **-OLEH NOOR ZAFIRA SHAFIE**